



IV GOVERNO CONSTITUCIONAL SEKRETARIA ESTADU KONSELLU MINISTRUS

KOMUNIKADU IMPRENSA

Sorumutu Konsellu Ministrus iha loron 10 fulan Marsu tinan 2010

Hala'o Sorumutu Konsellu Ministrus nian iha Kuarta-feira, loron 10 fulan Marsu tinan 2010, iha Sala Sorumutu Konsellu Ministrus, iha Palásiu Governu, iha Dili, hodi aprova ona:

1. Rezolusaun ne'ebé aprova kona-ba Akordu CPLP iha Defeza nian.

Objetivu globál Protokolu ida ne'e nian atu promove no fasilita kooperasaun entre Estadu Membru Komunitade País sira koalia Lian Portugés (KPLP) liu-liu iha área Defeza nian, liu hosi sistematizasaun no klarifikasaun asaun nian hirak ne'ebé atu estabesele ba País sira ne'ebé forma (CPLP).

Atu hateten katak, Akordu ne'e kria plataforma ida hodi tau hamutuk koñesimentu sira iha matéria kona-ba Defeza Militar nian, promove política komun kooperasaun iha área Defeza Militar nian, no hodi kontribui ba dezvoltamentu kapasidade interna atu nune'e bele hametin liu tan Forsas Armadas País CPLP sira nian.

2. Proposta Lei Kona-ba Rejime Espesial hodi Define Titularidade ba Bein imóvel sira - Lei kona-ba Rai nian.

Atu regulariza situasaun jurídika bein imóvel sira nian iha Timor-Leste, promove distribuisaun propriedade ba sidadaun sira no garanti ema hotu-hotu iha asesu hodi hetan rai, mak Lei ida ne'ebé hetan ona aprovasaun husi Konsellu Ministrus ho alterasaun sira, estabesele Rejime Espesial ba Definisaaun Titularidade ba bein imóvel sira no kria mekanizmu ne'ebé bele identifika proprietáriu lejítimu sira no rekoñese no fó direitu uluk nian ba propriedade. Prinsípiu orientadór mekanizmu sira mak ne'e : iha respeito ba direitu uluk nian mak uluk liu, rekoñesimentu ba pose nu'udar fundamentu atu hetan direitu ba propriedade no satisfasaun kompensatória ba kazu hirak hetan direitu dala rua.

Tanba diploma ida ne'e importante tebes maibé iha difikuldade oioin (nune'e mós diploma rua ne'ebé tuir mai) mak hahú tiha ona halo análise iha sorumutu baibain iha Kuarta-feira liu-ba, no hatutan tan iha sesaun

estraordinária iha segunda-feira, loron 8 fulam Marsu, ne'ebé agora daudauk hetan ona aprovasaun husi Konsellu Ministrus.

3. Proposta Lei kona-ba Espropriação (hasai direitu ba propriedade ida husi proprietáriu ida).

Lei Espropriação, tuir prinsípiu konstitusionál legalidade no igualdade nian, atu hodi regula asaun sá ida mak Estadu bele halo espropriação ba propriedade sidadaun sira nian, bainhira hamosu problema ba interese públiku. Tan ne'e, sei estabese prinsípiu jerál ne'ebé tenke evita rekursu ba espropriação tanba utilidade pública, karik bele hetan rezultadu hanesan deit'liu husi dalan legal seluk ne'ebé la liu hosi halakon direitu ba propriedade partikular sira nian. Nune'e, la inklui ho esepasaun hirak ne'ebé mai hosi kalamidade, dezastre natural, mak kazu espropriação hirak ne'ebé relasiona ho defeza nasional no seguransa interna, estabese ona diploma ne'ebé regula katak la iha membru Governu competente ida mak deklarar espropriação tanba atu uza propriedade ne'e ba interese públiku sein Administrasaun ka entidade beneficiária buka uluk lai meius oioin atu hetan propriedade ne'e liu husi direitu privadu kona-ba bein sira, ne'ebé nia hakarak hetan hodi hala'o interese públiku.

4. Proposta Lei Fundu Finanseiru Imobiliáriu nian.

Prinsípiu planeamentu, koordenasaun, efisiénsia no responsabilidade nian ne'ebé orienta política pública ne'ebé relasiona ho implementasaun kona-ba Lei Rai no Lei Espropriação nian, akonsella atu dinamiza finansiametu husi enkargu finanseiru hotu-hotu ne'ebé rezulta hosi Lei Rai no Lei Espropriação nian, liu husi instrumentu jestaun nian tuir regra fundu espesial nian.

Diploma ida ne'e defini liu-liu kona-ba objetivu no finalidade atu Fundu Finanseiru Imobiliáriu bele estabese, mak institui no regula operasaun (Komisaun Diretiva) entidade responsável sira nian no regulamenta forma ida kompleta ba kompeténsia, prinsípiu no normas jestaun Fundu nian no sira nia rejime finanseiru.

5. Dekretu-Lei ne'ebé aprova Estatutu Universidade Nasional Timor-Lorosa'e (UNTL)

Iha tempu ida ne'ebé koñesimentu sai nu'udar baze prinsipal ba desenvolvimento sosioekonomiku no kultural país ida nian, universidade sira mak hetan fatin hodi kria no habelar koñesimentu hirak ne'e. Ho hanoin ida ne'e, mak UNTL asume nu'udar misaun ba jersaun, atu habelar no aplika koñesimentu ne'ebé foka liu ba liberdade hanoin no halo kritika oioin, atu nune'e bele sai sociedade ida ne'ebé justu no demokrátiku, hodi fó valór ba kultura esperiénsia akadémika nian, ho objetivu atu serví desenvolvimento ba Komuidade, hodi hatán ba sira nia nesesidade sira. Ho ida ne'e, UNTL desenvolve ona modelu ida kona-ba organizaçao UNTL nian nu'udar Universidade Pública iha nível nasional, hodi bele adapta ba

inovasaun no evolusaun matenek nian no promove atu aumenta koñesimentu entre disiplina hotu hotu, nune'e mós atu halo jestaun ba rekursu hirak ne'ebé mak iha ona.

Modelo organizasional ida ne'e atu hodi reforsa artikulasaun política estratéjika Universidade nian no desenvolvimentu ekonómiku-sosial ne'ebé País ne'e suporta, hodi adopta desentralizasaun ba nia Unidade Orgánika husi rejaun oin-oin, liu husi jestaun integrada untre ensinu no investigasaun ne'ebé iha ligasaun ho karakteristikidade ekonómika, sosial no kultural husi rejaun ida-idak.

6. Rejime jurídku Adminitrasaun no Jestaun ba Sistema Ensinu Báziku

Sistema ne'ebe hetan aprovasaun liu husi diploma ida ne'e sai inovador, maske iha planu internasional, no bazeia ba kriasaun agrupamentu ba Eskola ensinu báziku nian ne'ebé halo tuir estrutura administrasaun no jestaun ida, hodi promove koordinasaun entre servisu sentráal no rejionál Ministério Edukasaun nian hó Estabelesimentu Ensinu Báziku nian namkari iha país nia laran tomak, hodi fasilita implementasaun política edukativa no hodi jere efisiénsia bot iha jestaun ba sistema hotu-hotu.

Nune'e, ida ne'e mak sistema integradu Estabelesimentu Ensinu nian, ne'ebé tenke iha koordinasaun entre Eskola Bázika Sentral ida ne'ebé apoia funsionamentu, iha aspektu hotu-hotu, ho Eskola Bázika Filiál sira ne'ebé mak hateten kona-ba nia kompeténsia territoriál no karakteriza tuir fatin ida-idak nian, hodi bele maximiza rekursu finenseiru sira ne'ebé iha, atu nune'e bele iha implementasaun ne'ebé eficiente liu ba Kurrikulu Nasional no orientasaun pedagózik, satisfasaun diak liu ba nesesidade formasaun dosente sira nian, jestaun ba rekursu umanu no kriasaun ba kondisaun ne'ebé mak própriu hodi hetan susesu eskolar alunu sira nian.

7. Rezolusaun n'ebé altera Rezolusaun Governu nian kona-ba Resenseamentu Eleitorál

Tanba agora daudauk tempu komemorasaun Semana Santa nian, Konsellu Ministrus altera ona kalendáriu ba atividade Resenseamentu Eleitorál nian ba Distritu Manatutu no Kovaliva.

Nune'e, atividade hirak ne'ebé prevee tiha ona ba loron 29 fulan Marsu to'o loron 3 fulan Abril tinan 2010, ba distritu rua ne'e, sei hala'o fali entre loron 26 no 30 fulan Abril tinan 2010.

Prosesu resenseamentu eleitorál nian, ne'ebé agora daudauk la'o hela, ho objetivu, hosi sorin ida atu prepara prosesu eleitorál ne'ebé prevee tiha ona ba tinan ida ne'e, no mós atu bele rezolve situasaun irregular sira ne'ebé mak hatene tiha ona relaciona ho Subsídiu Apoiu ba Idozu no Inválidu sira.

8. Apresentasaun Planu Atividade no Orsamentu Komisariadu Timor-Leste nian ba Expo 2010 iha Shanghai Xina.

Komisariadu Timor-Leste nian hodi hola parte iha EXPO 2010 SHANGHAI XINA, apresenta ba Konsellu Ministrus proposta planu aktividade no nia orsamentu ida-idak, ne'ebé hetan ona aprovasaun.

EXPO 2010 SHANGHAI XINA hanesan eventua ida iha nivel mundial ne'ebé sei iha representante husi rai hotu-hotu, aleinde iha mos representasaun husi organismu internasional sira, hanesan ajensia Nasoens Unidas nian balu no prevee ona atu bele hetan ema hamutuk tokon 80 mak ba halo vizita iha fatin ne'ebá.

Partisipasaun Timor-Leste iha fatin internasional ne'e sai importante tebes ne'ebé permiti fó ba Mundu imajen ida pais nian hanesan fatin ida ne'ebé dame no dezvoltimentu nian.

9. Apresentasaun kona- ba Akordu Copenhaga no Relatóriu Kona ba Cimeira

Hala'o tiha iha fulan Dezembru tinan 2009, iha Copenhaga, konferensia ba dala 15^a. husi rai sira ne'ebé mak ratifika tiha ona Konvensaun Nasoens Unidas nian kona- ba Mudansa Klimatika (COP 15) ne'ebé Timor-Leste mos hola parte.

Maske la konsege hetan akordu vinkulativu sira, maibe fó sai duni deklarasaun politika ida ne'ebé hanaran "Akordu Copenhaga" ho konteudu hanesan tuir mai ne'e: limita atu hasa'e temperatura global la liu husi grau sentigradu 2, no pais hirak iha Anexo 1 sei reduz sira nia emisaun no submete sira nia meta redusaun emisaun nian molok loron 31 Janeiru tinan 2010, no alokasaun fundus, husi pais dezvoltidu sira ba pais hirak ne'ebé hala'o hela dezvoltimentu ho difikuldade oioin, hamutuk biliaun 30 iha 2010-2012, no biliaun 100 ba tinan ida hahu husi tinan 2020.

Relatóriu kona- ba Cimeira, ne'ebé apresenta ba Konsellu Ministrus, foka liu-liu kona-ba desizaun no rezultadu Enkontru Kopenhaga nian, ne'ebé Timor-Leste mos hola parte, no reflekte, hanesan kedas, implikasaun ba desizaun ne'ebé foti ba dezvoltimentu nasional Timor-Leste nian.